



Remo Caminada, il victur da la concurrenza «communication design».

MAD

## «Red Dot Award»: Caminada ha fatg puncts

■ (cp) Per la creaziun e concepziun da la nova pagina-web da la Lia Rumantscha (LR) ha il designer Remo Caminada gudagnà in dals «Red Dot Awards 2015» prestigius. Il Grischun da 41 onns tutga tar ils victurs da la sparta «communication design». Il «Red Dot Design Award» è ina da las concurrenzas las pli impurtantas en tut il mund per communication design. Cun bunamain 7500 inoltraziuns da 53 pajais stat il «Red Dot Award» per las meglras campagnas, strategias da marketing e soluziuns creativas internaziunalas en la sparta communication design. In da quests awards dastga il concepider e designer grischun Remo Caminada prender encunter l'en-tschatta da november. El survegn la distincziun per il concept e la realisaziun da la nova pagina-web da la LR. Sco gia tar il dicziunari online Pledari Grond sa basa el danovamain sin l'interacziun e la participaziun dals utilisaders. Els pon dar agens impuls e publitgar infurmaziuns, per exempel en la nova rubrica «chalendar». Qua publitgescha la LR atgnas occurren-

zas ed occurrenzas d'organisaturs externs. «La distincziun cun in dals Red Dots prestigius mussa ch'igl è reussì a nus da persvader la giuria cun il nov concept ed il corporate design respectiv da la pagina-web e da far ressortir sia impurtanza per la regiun e la lingua e cultura rumant-

tscha», di Remo Caminada. Er Urs Cadrui, secretari general da la LR, è intgantà: «Igl è stà grondius da collavurar cun in artist sco Remo Caminada. Ad el èsi reussì da realisar a moda optimala noss basegn da manar in dialog e la participaziun dals utilisaders sin la pagina-web. E quai betg mo quai che riguarda l'aspect tecnic mabain era visual.»

### Biografia Remo Caminada

Remo Caminada è creschì si a Saggogn. Suentar l'emprendissadi da dessignader da construcziun auta ha el frequentà il seminari da scolasts a Cuira e pli tard la Scol'auta d'art figurativ ed art applitgà a Turitg. Suentar ha el fundà sia firma da design «Mokum» ed ha studegià dirigent d'orchester e cumposiziun. Per sia lavur sco designer ha el gia survegnì numerus premis svizzers ed internaziunals. Remo Caminada sa perfecziunescha oz en l'Italia e viva a Reggio Emilia.

### Concurrenza da design internaziunala

Il «Red Dot Design Award» è ina concurrenza da design reconuschida internaziunalmain, organisada dal «Design Zentrum» Nordrhein-Westfalen. Ils victurs survegnan in «red dot», in punct cotschen. Quel vegn surdà d'ina giuria internaziunala che sa cumpona da concepiders, professurs da design e schurnalists dal fatg da 13 pajais. Undradas vegnan lavurs cun ina qualitat da design extraordinaria. La distincziun dals victurs e la surdada dals certificats dals «Red Dot Awards 2015» ha lieu ils 6 da november 2015 a Berlin. Las lavurs premiadas vegnan exponidas per in onn en il «Red Dot Design Museum» ad Essen.